

通鑑綱目釋地糾謬

漢書門
八七六五類
一六六三冊
函架冊

內閣文庫
漢書
八七六五類
一六六三冊
函架冊

內閣文庫
番號 漢 8755
冊數 6 (1)
函號 284 13

284-13

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

G Y M


© Kodak, 2007 TM: Kodak



序

讀顧寧人先生左傳杜解補正歎其攷覈之精運思
之密有非近世涉獵之學所得而庶幾者歲壬申承乏
去寧人先生家不三百里意好古績學之士或猶
能遇之者而未有以得也浦山張君邑之獨行士也好
讀書治古文詞不求合於世殆韓子所謂能自樹立者
今年夏出所著綱目釋地糾謬補註若干卷以相質余
觀其書大致本顧氏讀史方輿紀要而穿穴史載旁推
交通則心所獨得其於山川阨塞之處真不啻聚米畫
沙目可尋而手可按浦山其好古績學者與惜乎當世

淺草文庫



無寧人先生其人者而與之一是正也。攷永中文獻講
方輿者有顧野王之輿地志近世徐善著春秋地名攷
號稱博雅今輿地志靡得而詳矣敬可著書而爲有力
者所得不克以其名自表見余懼浦山之書有起而奪
之者緣梓而行之書此以弁其首

乾隆十有八年冬十月同學弟關中符大紀譔

則據事勢情形以定至其所未詳者不註者一一補之
惟封爵之地多挂空名似無關係有不補也窮兩載之
晝夜以成時觀察已解任恐無能與尙論同梓因別成
糾謬補註兩種俾讀綱目者按事校之則於考亭分註
之深意庶幾無晦自非好摘前人之疵誠以綱目起見
有不得已者然一已固陋之識烏能悉當又雍正乾隆
間所改所分郡邑尙未盡詳則恭俟一統志頒行改
正乾隆庚午冬十月旣望秀水張庚浦山氏謹書於強
恕齋

通鑑綱目釋地糾謬卷之一

秀水張 庚浦山著

錢塘杭世駿董圃叅訂

第一卷

初命晉大夫魏斯趙籍韓虔為諸侯
周威烈王二十三年

蔡臯狼集覽云臯狼趙邑本蔡地故曰蔡臯狼按鮑氏云蔡當作藺趙世家成侯三年衛敗我藺又武靈王曰先王取藺郭狼郭狼即臯狼矣藺故城在山西汾州府永寧州西臯狼故城在永寧州西北汾水可

以灌安邑絳水可以灌平陽胡三省通鑑註以絳水不可灌平陽而謂郡縣離合川谷變遷有不可以一時所睹據者紀要以爲史文之交互按汾水在平陽府城西二里南去安邑約三百里斷不能引以灌之若絳水源出絳縣西南絳山西流入聞喜縣爲涑水上源西南經安邑又西歷猗氏至臨晉合姚暹渠西流至蒲州又西南注于黃河涑水卽絳水也按圖以考其原委去平陽甚遠安邑則其所經則絳水可以灌安邑萬不能灌平陽蓋史文錯誤非交互也胡氏謂郡縣離合川谷遷改不知文字譌誤爲尤易耳

魏吳起奔楚楚以爲相

安王十五年

夏桀之居集覽引帝王世紀爲陽翟按陽翟故址在河南開封府禹州爲禹始封夏伯之地非邦畿也禹自受舜禪都于安邑卽今平陽府絳州安邑縣其後帝相徙居帝邱少康中興復還安邑舍此明證而云陽翟何也羊腸在其北集覽註甚明質實以爲潞安府壺關縣之羊腸坂按此則當言左不可以北言矣商紂之國古朝歌地今衛輝府濬縣西五十里之衛縣故址是也集覽引鄭元云商國在泰華之陽又引皇甫謐云上洛商也直以陝西商州當之商州乃商

於與紂都何涉曰商紂不曰殷紂從建國始號也烏
可因商字而云商國商州也又引劉氏言紂之國左
孟門則東邊別有孟門而以爲是石州之孟門縣石
州卽今汾州府永寧州更在大行之西何以左言其
言左孟門右大行不過泛論河山險固不必求其實
也至索隱所言在朝歌東不知朝歌東則爲大名府
開州兗州府曹州焉得有孟門

齊魏會田于郊

顯王十四年

高唐齊邑故城在今濟南府禹城縣西四十里非今
之高唐州也今之州治乃漢所置高唐縣與故齊邑

壤雖接而地實非

韓伐東周取陵觀廩邱十七年

廩邱本齊邑史記齊世家宣公五十一年田會以廩
邱叛入趙是也東周所保僅鞏邑廩邱安得爲周地
按韓世家昭侯六年伐東周取陵觀邢邱邢邱爲溫
國在鞏北二十五里卽今懷慶府南五十里之溫縣
陵觀故址在懷慶府南七十里其地相比故並取之
則邢邱爲是廩邱爲譌質實混引並不考正

趙始胡服招騎射

赧王八年

至房子集覽云房子縣屬常山郡今真定府平山縣

有房山非是按房子縣故城在真定府高邑縣與房山無涉登黃華之上質實以河南彰德府之隆慮山一名黃華山遂引之按史武靈王遂之代北至無終西至河登黃華之上代即今山西大同府去彰德遠甚其所登之黃華即大同西南黃瓜堆本名黃華山也黃河在大同西其地與林胡樓煩接故欲胡服

秦楚盟于黃棘

十一年

黃棘古謝國漢置棘陽縣故址在河南南陽府新野縣東北七十里集覽引正義云在房襄二州之境無確據矣

秦取魏蒲坂晉陽封陵

十二年

晉陽魏世家作陽晉索隱以爲晉陽正義從而是之以爲史文之誤按蒲坂陽晉封陵相連屬故秦人一時並取若晉陽爲趙地烏得與魏地並書且晉陽即今太原府太原縣與蒲坂隔一汾州府相距數百里斷不能並取然則史文未嘗悞索隱正義自悞耳綱目未之檢故仍之集覽質實皆襲譌混註陽晉故城在蒲州臨晉縣西蒲坂即今蒲州封陵在蒲州南

燕上將軍樂毅至國君

三十一年

昌國集覽引括地志爲曹州城武縣東北梁邱故城

又引正義曰在淄川東北考核無定見矣按昌國本名昌城齊邑燕爲昌國以封樂毅漢置昌國縣故城在濟南府淄川縣東北三十五里正義是也

秦白起伐楚取鄢鄧西陵

三十六年

鄧質實以爲南陽府之鄧州非是此是春秋鄧國故城在襄陽府漢水北岸若南陽之鄧雖亦鄧國地戰國時屬韓爲穰邑韓世家秦取我穰是也後稱鄧林隋始置鄧州西陵集覽質實皆以爲夷陵不知夷陵之西陵乃峽名非邑名至三國吳廣武初始改夷陵爲西陵此是今黃州府東北之楚邑漢爲西陵縣

徐廣曰屬江夏郡極是胡三省辨之亦未細考按秦本紀昭襄王二十八年白起攻楚取鄢鄧無西陵楚世家頃襄王二十年秦將白起拔我西陵蓋兩事在一年之中故并書不然鄢鄧與西陵相隔甚遠恐不能一時兼取

秦拔魏邢邱

四十九年

邢邱集覽據魏世家爲鄴邱又引徐廣曰一作廩邱一作邢邱而兩註之按魏世家秦拔鄴邱在安釐王十一年正周赧王四十九年再按秦本紀昭襄王四十九年夏攻魏取邢邱懷亦當周赧王四十九年兩

事在一年內拔鄆邱雖不書時必在取邢懷之後何以知之以拔鄆邱後齊楚相約攻魏魏求救於秦秦發兵魏氏復寧於是魏欲親秦而伐韓信陵上書止之書中又有秦固有懷茅邢邱之語故于拔鄆邱雖不能考其爲秋爲冬其在取邢邱之後決矣惟是安釐王九年秦拔我懷無邢邱與秦紀不合亦差兩年蓋史文舛錯大書據通鑑未之考定也鄆邱在鳳陽府潁州東邢邱卽今懷慶府溫縣按顯王十七年韓取東周邢邱後又爲魏所取故爲魏邑

秦伐趙取三城齊救却之

至中陽五十年

中陽集覽引正義曰燕無中陽括地志云中山故城一名中人亭在定州唐縣爾時屬燕按唐縣卽故唐城春秋屬燕謂之陽邑左傳昭十二年齊高偃帥師納北燕伯於陽是也其西北卽中人亭與陽邑相距十三里史蓋合兩地而書之耳

楚納州於秦

五十三年

州集覽引徐廣註爲南郡州陵縣又引括地志爲安邱縣淳于國按山東青州府安邱縣東之古淳于國本春秋州國後爲杞人所有謂之杞城襄二十九年晉人城杞之淳于是也蓋至戰國無復州之名矣則

徐廣說爲是州陵故城在今湖北荊州府監利縣東三十里荊州秦屬南郡

第二卷

趙伐燕取狸陽

秦王政十一年

狸陽集覽引正義謂燕無狸陽疑漁陽之譌按漁陽秦郡名戰國時尙未有闕之可也

築宮咸陽北陂上

始皇二十六年

章臺宮在長安故城內宮中有章臺因名質實以爲章臺街引張敞走馬爲證非是

帝巡隴西北地至雞頭山過回中

二十七年

回中孟康曰在北地集覽質實皆以爲鳳翔府隴州之回中宮按始皇由隴西至北地登雞頭過回中北地郡今平涼府雞頭山在平涼西四十里平涼之東百五十里爲涇州有回中山山上有王母宮始皇好神仙故過之若隴州回中宮爲尋常宴遊地不足書也孟康說是

第三卷

王追項籍至固陵

至悉定

漢高帝五年

東城在鳳陽府定遠縣東南按羽自今之虹縣垓下潰圍南走至今之五河縣東渡淮至今之定遠縣西

北之陰陵迷失道轉至定縣東南之東城乃率二十
八騎與漢決戰斬一都尉於是又東南走至今之和
州欲渡烏江也集覽質實因和州有山亦名陰陵又
有東城註遂混東城與烏江爲一處矣不知和州之
東城卽秦烏江亭至漢始置東城縣爾時尚未有東
城之名其山名陰陵亦後人附會不足據羽分騎期
山東爲三處山東之山必是定遠東之大橫山質實
因分注有四潰山三字遂引今江浦縣之四饋山附
會按羽本紀只云項王自度不得脫謂其騎曰吾起
兵云於是大呼馳下並無四潰山三字不知分注

何所據而質實亦不細考見字卽註也且潰與饋本
不同如何混引又按和州北七里有四潰山俗傳
項王依山爲陳四面馳下潰圍處亦是後世因之而
名非當時卽名四潰也

第四卷

以主父偃嚴安徐樂爲郎中

武帝元朔元年

深入匈奴燔其龍城龍城匈奴都城名也集覽謂在
上谷郡北非是上谷北之龍城本名柳城晉咸康七
年慕容瑄以柳城之北龍山之西爲龍德之地乃營
宮廟改柳城爲龍城

東越王餘善反至擊之元鼎六年

勾章城有二一在寧波府慈谿縣南二十五里越王勾踐并吳後築以章霸功而名秦置勾章縣漢因之即是年橫海將軍所出之道也一在寧波鄞縣南六十里與慈谿接壤為晉隆安四年孫恩作亂劉牢之討之改築於小溪鎮者自劉宋及隋唐勾章縣皆治此開元中省入鄞縣與橫海所出之勾章不可混質實所引全無分曉

第五卷

築塞外城障太初三年

盧朐質實云匈奴中地名按盧朐山名在陝西榆林衛廢夏州塞外質實殊混

第六卷

置西河北地屬國以處匈奴降者宣帝五鳳四年

西河質實云註見周威烈王二十三年則是今山西汾州府矣汾州與古北地郡相去遠甚如何並置屬國按北地郡即今陝西寧夏地西河即今榆林衛與寧夏後衛接境寧夏衛雍正二年改設府立子康為濟陽王元帝永光三年

濟陽質實註云漢初縣名屬濟陰郡後為濟陽國故

城在山東兗州府曹縣西南按濟陰之爲濟陽是晉所改郡名質實悞也漢初濟陽縣屬陳留郡元帝改爲國以封康故址在河南開封府蘭陽縣東

第七卷

新城侯趙欽以罪免

哀帝建平元年

新城質實以爲咸陽之新城按新城本戎蠻子邑戰國謂之新城漢惠帝四年始置新城縣屬河南郡若咸陽之新城本秦咸陽縣漢初改爲新城至武帝元鼎六年改曰涇城縣無復新城之名矣趙欽爲成帝所封則是河南之新城非西安之新城

第八卷

臨淮琅邪及荊州綠林兵起

新莽天鳳四年

荊州饑饉民衆入野澤掘鳧茨而食之按楚多藪澤野澤者非若雲夢大澤而必有其名質實欲求其地而不得乃註云未詳處所不自知其謬矣

蓋延克睢陽劉永走湖陵

光武建武二年

湖陵質實云縣名注見建武二年本二年事何又云云按湖陵城在徐州沛縣北五十里王莽改曰湖陸

第九卷

遣中郎將來歙伐隗囂取畧陽

建武八年

畧陽質實云註見晉懷帝永嘉四年檢之乃漢中府畧陽縣也時隗囂據天水即今秦州畧陽正當隴口入州之要害故光武聞來歙得之而喜若漢中之畧陽本漢沮縣屬武都郡至後魏僑置畧陽縣於此梁得其地為武興郡直至元始置畧陽縣屬沔州明改屬漢中府且地與秦州絕不相涉此畧陽為漢畧陽道屬天水郡故城在秦州秦安縣東北六十里

烏桓與匈奴鮮卑連兵入寇

建武二十一年

烏桓居上谷塞外白山集覽引廣志與括地志地理志諸書為西域之天山因其一名白山也殊不知烏

桓為東夷去西域遠甚本文明曰居上谷塞外白山則山在上谷郡之塞外何得以西域之山混之按白山在直隸大寧廢衛北朶顏之南境唐志白山在五院關外大荒中是也

第十卷

罷治滹沱石臼河

章帝建初三年

羊腸倉質實云坂名注見周安王十六年乃潞安府壺關縣羊腸坂也非是按羊腸倉在太原府崞嵐州嵐縣水經注汾陽故城積粟所在謂之羊腸倉者其山亦有羊腸坂故名通鑑註極明白質實不之考故

混石白河都慮並見補註

以虞詡為武都太守擊羗破之

安帝元初二年

遷詡于陳倉嶠谷陳倉今鳳翔府寶雞縣其地無嶠谷有箕谷溫谷恐悞一以為嶠谷也質實引河南府永寧縣之嶠山去陳倉遠矣謬甚赤亭見補註

第十一卷

封皇后兄子鄧康宦者侯覽等

桓帝延熹二年

高鄉侯質實以高鄉為縣名非是高縣名鄉侯猶亭侯按後漢書百官志列侯大者食縣小者食鄉亭觀下文又封小黃門八人為鄉侯可見高即鄠春秋晉

邑漢置鄠縣光武即位于鄠南更名曰高邑故城在真定府趙州柏鄉縣北二十三里高鄉侯蓋食高邑之鄉也

第十二卷

先零羗及涼州羣盜北宮伯玉等反

靈帝中平元年

別屯河陽以拒賊河陽按後漢書作阿陽註云阿陽縣屬天水郡天水即今秦州阿陽故城在秦州秦安縣西北分注譌為河陽質實不能考正而引懷慶府之故河陽縣當之相距數千里矣謬甚

朱儁擊南陽黃巾連破之

同上

登土山望之按南陽府城西七里有卧龍岡岡無石皆土所云土山或即此也若質實所引汝寧府信陽州之士雅山相距三百二三十里如何望見南陽城中

第十三卷

郭汜攻李傕傕遷帝于北塢獻帝興平二年

黃白城集覽註云屬河南郡非是按通鑑有池陽二字分注刪之蓋城在池陽縣也池陽屬馮翊故城在今西安府三原縣西南二十里

帝至弘農至樂營同上

上與公卿步出營皇后兄伏德扶后御船到大陽幸李樂營按本文則知獻帝從陝州之大陽津渡河到解州大陽縣也大陽故縣在聞喜縣東與南岸大陽津對集覽引正義云今陝州河內縣其本末已不詳質實專指大陽津則上下情事益不明矣蓋不知有大陽縣也

孫策取會稽太守王朗降建安元年

查瀆質實註查瀆在寧波府定海縣東北非是在紹興府蕭山縣西南吳越曰查浦

曹操擊張繡降之至子昂建安二年

益壽亭侯質實云壽亭疑是縣名謬甚按亭侯漢列侯爵詳見桓帝延熹三年

呂布復攻劉備 建安二年

白門樓集覽註白門徐州城門名引陳后山詩只有青樓與白門為證非是按白門下邳城南門也下邳即今淮安府邳州西距徐州百八十里時布屢敗還保下邳曹操乃引沂泗灌城沂水在邳州城西一里泗水在邳州城南二里以本文推之何得云徐州况徐州只有泗水並無沂水

第十四卷

馬超入涼州 至漢中 建安十八年

姜叙屯歷城質實引山東濟南府歷城縣而云註見宋文帝元嘉七年謬極蓋涼州去山東甚遠也按歷城故址在今鞏昌府成縣西即建安城也通鑑註云去仇池一百二十里

魏王操出斜谷 至漢中 建安二十四年

操運米北山下黃忠引兵欲取之北山質實因階州卧龍山一名北山遂引之今以地之遠近考之不能合也按漢中府郿縣有太白山在縣東南三十里太白終南名雖二實則一山綿亘故太白山在關內名

南山在漢中名北山則此北山即太白矣維時操出斜谷谷在郿縣西南三十里谷與山相距七十里故忠欲取所運之米若階州之北山相去六百餘里又在漢中西操之運米豈有反由西路而遠轉也


魏師攻濡須別將至引還後主建興元年

襲中洲質實云中洲有二處一在長沙府瀏陽縣一在郴州城東郴江中按所引二處皆在湖南與事在江南廬州府者無涉此中洲即廬州府無為州之羨溪亦名中州

丞相亮討雍闓至四郡建興三年

益州郡今雲南府按漢武帝平滇開置益州郡又於蜀郡兼置益州三國時蜀郡為漢所都闓所叛乃雲南之益州也集覽云古蜀國質實云注見蜀非是

受業臨桂胡惠琳校字男時敏覆校



通鑑綱目釋地糾謬卷之一終

文正公集

新編采地系言

三

國語彙編卷之三國語彙編卷之三國語彙編卷之三
國語彙編卷之三國語彙編卷之三國語彙編卷之三
國語彙編卷之三國語彙編卷之三國語彙編卷之三
國語彙編卷之三國語彙編卷之三國語彙編卷之三
國語彙編卷之三國語彙編卷之三國語彙編卷之三

